

Nowodhow an Seythen

10/03/2009

UNESCO re dheskrifas Kernewek avel yeth marow yn nowyttha dyllans y lyver *Atlas of the World's Languages in Danger*. Nyns yw hemma an kynsa gweyth Kernewek dhe vos deskryfys yndella, mes wosa degbledhen ynni may feu an taves aswonnys yn sodhogel gans governans an Ruwvaneth Unys, hag ynni may feu Kernewek devnydhys moy ha moy yn bewnans puptydhyek an Dhugeth, yma lies Kerneweger oll a-dro dhe'n bys nebes sowdhanys, ha serrys ynwedh. Byttegyns, nyns yw an taves Kernewek kas unnik: y'n keth lyver y teskrifir an Manowek avel yeth marow keffrys.

Ayr SothWest re dherivas y fynnonn kynnik dew neyj dihedh orth an dydh ynter Ayrborth Cita Loundres ha Tewyn Pleustri a-dhia vis Ebryl.

Tim Jones, esel Kusul Negys Dewnans ha Kernow, a lever y fydh an neyjow na 'linen vewnans' rag an negys ha'n douristieth y'n Dhugeth.

Manlyon an kevradow toll gonsel rag an vledhen a dheu re beu dyllys.

Konsel Kernow nowyth a ragsettyas kressyans kresek an doll gonsel dhe 2.9% dre vras, mes y fydh dyffransow bras yntra'n rannvroyow. Rag ensompel, res vydh dhe dus Pennwyth pea 4.9% moy, mes rag tus Keryer ny vydh saw kressyans a 0.54%.

Artydh keswlasek a-vri a lever ev dhe gonvedhes sorr an Gernowyon orth tolow an Governans sevel milyow a dreven nowyth yn Kernow. An gravyor Darren Lago - neb a removyas dhe Gernow y honen nans yw teyr bledhen - a lever bos tekter an vro yn peryl awos an polisi a wordhisplegyans lonchys gans Loundres.

Henn yw oll rag Nowodhow an Seythen – tereba nessa!